

粵臺徵雅錄
匪石山人詩



粵

臺

徵

雅

錄

羅元煥 撰
陳仲鴻 註

中
華
書
局

叢書集成初編

粵臺徵雅錄（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一
統一書號：一七〇一八·一五一

此據嶺南遺書本
排印初編各叢書
僅有此本

序

粵臺徵雅錄者，羅章山先生所作歲暮懷人詩也。章山既歿十年，厥友南賓陳君，以爲此詩不獨可以見章山及章山所懷之人，而吾粵之雅人雅事，多由此而可徵，故詳爲之註，名之曰徵雅錄而梓之。章山長予二十年，陳君於余亦幾十年以長，予素以兄呼之，而於章山交未深也。憶乾隆乙酉科試郡邑，博士例於諸生中舉報優行，當是時，吾邑所舉者六人，予與章山名居前，列章山與余皆力辭不獲，予於是年幸膺選拔，旋領賢書。章山方有事於徵選粵詩，竟不與考，余竊愧焉。未幾，章山即引疾，歲科試輒不赴，會新司鐸者至，爲學中胥役，苛求構隙，章山遂棄諸生去，不復踏省門。予彌服其高也。生平所爲詩古文詞，遐邇交推，惟不輒以示人，予偶獲見之，輒爲心折。同里陳雲麓太史，章山世講執友也，既卒，厥孤丐章山文爲狀，章山以推予，並手書來屬，予益愧不敢當。不知章山何所取於余也。茲刻成，陳君屬予弁其首，予於陳君近爲其姻家子，然相昵久，不能遽改呼也。今安敢以不文辭。陳君詩筆俱工，與章山相埒。選詩之役，嘗預事分輯，其胸次高曠，亦與章山相近，故相知最深。知此詩不足以盡章山，章山亦不藉此詩以傳，而必爲之註而梓之者，其意固不專在乎章山也。嗟乎，吾粵僻處海濱，士風淳樸，罕標榜爲名高者，因之輅軒所至，無從採訪，往往有奇人碩士，制行卓然，其著作亦多所關繫，而姓名湮沒，不傳於後者，何可勝道。詩文風雅之遺佚，其小焉者也。如金竹先生之文行，或以爲吾粵白沙後一人，何西池前輩亦有絕學，

朱紹之詠其論雖未知確否而要非章句之儒所能逮也。去其世未可云遠。文獻具存而能言之者已鮮。近有來游嶺外者於席閒稍得所聞。卽爲之撰傳播於藝林。欲垂永久得之者將謂金竹先生藉此乃傳讀陳君詩註所引適見掛一漏十未墜舊聞反爲所掩則此錄豈可少哉。陳君不爲世網所羈志存著述所註章田詩洵足徵粵臺之風雅其有更大於此者當發其祕篋出而問世予將拭目俟之且欲使後之君子得繼其志焉。

嘉慶元年長至後二日南海勞渾潤之謹序於羊城仙湖之桂陽書室。

年僅得其名諱爵里亦云粗備乃倣昔人註詩之體並錄其出典別爲一帙題曰粵臺徵雅錄亟以先付剞劂愧余腹儉又藏書未廣所註舛漏知所不免至詩中之意有未能盡發明者則余所不及知不得不闕如矣博雅君子幸哂而諒之若其全彙應有當代元妄爲之表彰又何俟於余言章山名元煥字昭命爲諸生三十餘年及耆以告病缺贊迂邑博士遂棄去不復顧旋入貲爲國子生卒年七十有一附識於此庶讀其詩者可想見其人

乾隆六十年乙卯初冬海隅陳仲鴻南賓謹識

粵臺徵雅錄

南海 羅元煥 昭俞撰

同邑 陳仲鴻 南賓註

歲暮懷人絕句有序

己巳冬杪旅食三城。古歡闊遠。耿耿在臆。率爾成詩。得五十首。粵會舊有三城。至明初始合築。爲一。見廣東通志。

王慈思夫子

南北風烟雁素紆。郊城清興想公餘。俸錢沽得迎年酒。下以權衡一部書。

王慈思夫子。名植。字懷三。直隸深澤人。康熙乙酉孝廉。辛丑進士。官於粵。歷任和平。署平遠。海豐。潮陽。江。各縣尹。薦擢羅定州牧。兼攝德慶。尋以署海豐時因公墜誤。追論報罷。督撫兩院合詞保奏。引見。後回粵。以知縣補用。嘗講學於粵秀書院。章山所請業者也。旋歷署欽州及新會香山兩縣。丁艱。回籍。服除。命發山東。又歷署滋陽。授潛化。時調爲剡城尹。三年矣。風烟。杜少陵詩。斷腸分手各風烟。雁素。雁足繫帛書。見漢書蘇武傳。古詩呼童烹鯉魚。中有尺素書。王會之詩。淮潦浸天魚。有帛塞庭連雪雁。無書。按雁素魚帛皆互相借用字也。公餘。王元之詩。公餘多愛入林泉。俸錢沽。岑參詩。成都春酒香。

且用俸錢沽迎年。荆楚歲時記曰：歲暮家家具有藏，詣宿歲之位以迎新。年相聚酣飲，權衡一書，藝想先生在粵候補時所著其書，纂集古人名言遺事，足資學識者，得大目四十，細目百四十，有九，皆弁以春秋大義，而以仁敬兩言爲鉤紐，爲四十一卷，名曰權衡一書，鑲板於粵秀書院，以書下酒，用蘇子美事見何元明語林。

南海庶常陳雲龍撰王慧思先生傳，載其前後著述，有輯濂洛關三書，正蒙初義，韻學原委，韻學臚載，四書參註，道學淵源錄，皇極經世全書解，權衡一書，崇德堂集，諸書皆入三通館備採取，在粵和平羅定結會，皆有志在山東，鄒城有志，霽化僅一月，亦有志，本籍深澤定州各有志，雲龍乃其分校，粵閩所得士，故於其刻城解印時，卽爲之立傳，附錄所在二東三州九縣事實，至萬餘言，紀其政績，皆廉明顯著，洵非阿所好也，其所著書，後復經直隸制府採進，見欽定四庫全書總目提要，并錄其官，至邳州知州。

詹宜亭夫子

宜亭夫子古人儔，三仕于今已白頭。迴憶十年此時節，雪深還侍御書樓。

詹宜亭夫子，名良弼，字思凝，饒平人。雍正甲辰孝廉，是年補行癸卯正科，審閱鄉試，秋闈會試，連捷進士，初觀政刑部，爲額外主事，既歸，就廣郡學博，兼爲粵秀書院副山長，每會課分校文藝，一以昌明選舉爲主，尋薦擢直隸懷來縣尹，時方因公解組，後復改就學博，仍補授廣郡，兼副粵秀山長如故，諸生

凡曾經及門者概不受贊。卒官日囊橐蕭然。其學醇行介。士林至今思之。雪深。伊洛淵源錄曰。游辭揚時。初見伊川先生。先生瞑目坐。二子侍立。既覺。顧曰。汝輩尚在此乎。及出門。外雪深三尺矣。御書樓。章山文集有粵秀書院記。擬作首云。門以內有先賢堂。祀宋先賢。暨自宋至明先儒者也。中爲講堂。旁列屏障。書朱子白鹿洞訓條。堂左曰東齋。堂右曰西齋。士子肄業所也。後密室前植柳二株。垂陰翳然。上有樓以奉御書。故名御書樓。周處顏之編聯。儼然可考。

廖坡山先生

經傳弟子上青霄。原註謂番禺莊滋園殿撰。未庵編修兩昆季。未庵則其壻也。老去湖東樂事饒。拔地羅浮峯四百裏。來一一入詩瓢。

廖坡山先生。名垣。字位三。本三水人。以南海籍充郡文學。有羅浮詩草。其子禹和名銓。仍爲三水諸生。與章山同日遊泮。爲華亭王東麓督學所取士。湖東。所居在羊城仙湖街之東。拔地陸放翁詩。拔地突兀摩蒼穹。羅浮峯。黃文裕泰泉集羅浮山圖經曰。羅浮者山總名也。羅山在番禺東二百里。其上有桂樹神湖。浮山自海來傳之。其上有平田嘉穀崖巘。皆合爲一。臨于博羅之上。北望增城南望東莞高五千六百丈。其峯四百三十有二。詩瓢。唐詩紀事曰。唐球生於唐末。有詩名。居蜀之味江山。方外之士也。蜀人謂之唐隱居。爲詩隱。其爲韻納之大瓢中。後臥病投瓢於江。曰。斯文苟不沈沒得者。方知吾苦心。爾至蜀。渠有識者曰。唐山人詩瓢也。接得之。十纔二三云。原註莊滋園殿撰名有恭。後歷大中丞。宮

保大司寇協辦中堂宋庵編修名有信後歷山西冀寧監司俱見番禺縣志傳

陳石樵先生

八十名猶藝苑馳勩將淡墨繪新詩窮年漫作還山計載酒人來愛問奇

陳石樵先生名懷字維寬順德人文學以詩書擅名至老輿猶不倦嘗終歲留寓五羊名士多從之游有石樵詩集門人番禺馮箕村公侯孝廉同邑蘇灌園其編太學同編次其稿擬刻而未果淡墨黃山谷詩淡墨寫出無聲詩載酒問奇漢書揚雄傳曰劉棻嘗從雄學作奇字雄家素貧嗜酒人希至其門時有好事者載酒看從游學

康熙戊戌羊城沈奇玉琦開粵臺古蹟八詠詩社於白燕堂以浮邱井陸賈祠虞翻苑望氣樓沈香浦荔枝灣素馨田抗風軒爲題體皆七律預書牋致於城鄉吟侶匝月閒共收三千餘卷奇玉本洪都人僑寓於粵者也時適全州蔣容江南昌萬字兆兩太史太康許蒼嵐明府皆在粵遂延致主於其家同爲評閱選拔五百名揭榜於桂香文昌宮復開雕蟠華集二卷全作登集者十名石樵先生與焉居前者曰梁無技江潤韓海蔡道法汪後來梁文冠居後者曰黃朝舉夢龍陳份既又張驪召梨園侑觴雅會於西郊長壽僧院陳古村集中紀及之亦一時之盛事也蟠華集後輻詩則摘刻至百名以外其饒贈謝教儀物首名冠服全具佐以銀杯匕及文房玩器數品餘視榜之高下重輕有差自二百名後至榜末概送絲履一緇云粵中好爲校詩之會亦稱開社相傳謂自明季番禺李廉黎美周遂球禮閣

下第南還集廣陵進士鄭超宗元勳之影園卽席賦黃牡丹詩十首獨占冠軍名噪吳越有牡丹狀元之號鄉人豔之遂啓其風至預佈題并訂期收卷列第揭榜悉做浦江吳清翁月泉吟社故事惟屬其送詩賞之名曰謝教謙詞也諸吟卷不可效應試糊名故皆隱其姓字隨意取片語爲記亦如月泉社中翁舍老原署臨雲周陳原署識字耕夫之類榜上臚列謂之花號或曰言花者尙須更求其實云爾月泉吟社詩王漁洋池北偶談謂曾見有古刊本後始見琴川毛氏本今屬樊榭宋詩紀事亦采著於編但其體例以人繫詩故所錄不盡依其原評名次而有散見於異帙者非如汲古閣之重鐫古本矣白燕堂嶠華集則視月泉社所紀爲略每幅惟書其人之名綴以其字或號而已諸爵里及原署之花號皆闕而不錄附紀梁無技字王顯號南樵番禺人歲貢詩名素著王漁洋朱竹垞先後至粵皆與之游見帶經堂及曝書亭兩集詩著有南樵詩文初集二集江潤字秋溪駐防粵東旗籍人韓海字韓五號橋村番禺人雍正癸卯孝廉癸丑進士官封川學博乾隆紀元欽奉舉行博學鴻詞之科詔依康熙十七年無論已仕未仕者在京大臣及各直省督撫皆得延訪遴選其人保送赴部候試制軍長白時齋鄂公大中丞昆明虹厓楊公欲首薦橋村徵至則面辭令賦詩於夏蓮詞有句云欲待移根歸太液須尋十丈藕如船蓋寓言也制軍得詩愕然遂不復強著有東臯詩集文集蔡道法字景行番禺人汪後來字白岸號鹿岡番禺人康熙壬午舉題闕鄉選官千戎分防佛山退休後遂家焉晚年倡社汾江遠近吟士多仰爲職志尤擅於書性高介食貧自甘不輕以尺幅贈人澳門司馬宣城張芸墅與訂

文字交舊遊同廣郡中名輩共二十五人。贖金三百兩資之。南海何西池劍芳園集有詩紀其事。嘗有鹿岡詩集。梁文冠字弋雲。南樵子也。後以諸生舉優行。貢入成均。黃朝舉字首勳。南海人。夢鶴字岐也。南海人。陳份字子吼。號古村。順德人。丙辰恩科。孝廉。著有水陸詩集。梁韓汪陳所刻各集。俱載入八詠詩。蟠華集摘刻之詩。亦多名什。其後諸有集者。以非全選。遂并棄之不復存。

鄧泰亨先生

河南河北忝同袍。太息無端見二毛。守歲且添商陸火。延年不藉駐顏膏。

鄧泰亨先生。名蕃。字弗移。一字庶思。南海人。文學與章山爲忘年友。河南河北。珠江南岸地名河南。河南居人卽呼五羊爲河北。其於兩處就館授經。嘗與章山同時相鄰。同袍。毛詩曰。與子同袍。孔仲達疏曰。同袍。朋友也。二毛。左傳曰。不食二毛。註曰。二毛。頭白有二色。此云無端見二毛。謂其頭已白盡。無復見有二色也。守歲。東京夢華錄曰。除夕禁中爆竹山呼。聲聞於外。士庶之家。圍爐圍坐。達旦不寐。謂之守歲。商陸火。歲時雜紀曰。裴度嘗除夜嘆老。追曉不寐。爐中焚商陸火。凡數添。范嘉猷月令廣義。嘆老作體者。商陸草屬。其名不一。周易孔仲達疏曰。萸陸一名商陸。爾雅曰。萸蕩。馬尾。邢叔明疏曰。萸草萸陸也。一名萸蕩。一名馬尾。駐顏膏。白孔六帖曰。唐昭宗以臘日賜韓偓銀合子。駐顏膏。高郵夏禮谷督學按臨歲試。刊泰亨先生覆卷頒行。題爲伯夷叔齊何人也。曰。古之賢人也。文用散格。計三百七十三字。評云。讀書有得之言。足以扶翼名教。覺太史公伯夷贊無此正大也。筆力奮勁。亦如龍門之桐。

百尺無枝生正試卷情墨欲側字跡模糊了不可辨按之則文理粲然步武一追先正覆試目問其年八十有五矣爲諸生五十餘年未得一食康餽而摩挲好古老益不衰爲拔冠一軍以爲老于嗜學者勸云

家石湖先生

江東叔父我曾呼詩筆爭傳後石湖原註謂前有吳郡范石湖也著舊譜中搖落盡魯靈光殿歸然孤

石湖先生羅氏名天尺字履先順德人丙辰恩科孝廉初屢困於童子試迨年近強仕吳縣惠天牧督學按臨卽見拔而大加讚賞持手錄其試古學之荔枝賦廣州竹枝詞以示諸生旋攜往惠潮分助校士是爲惠門八子之一雍正八年庚戌會稽谷秋陸庶常應聘來粵總輯廣東通志設局於粵秀書院遂與南海勞阮登吉以詞翰爲當事所知因戲與分羹之役撰擬諸稿多所取焉尋以資望未深頗招謗議乃相繼辭出故志成苦不得列名後與阮登各有贈答秋陸太史詩略紀其事所著有五山志林野臚山房詩鈔文鈔前有前後集晚年以二集自爲去取手定爲詩刪所居里名石湖在順德城北門外蓋因地爲號江東叔父舊五代史梁書羅紹威傳曰紹威工筆札曉音律服膺儒術好招延文士聚書萬卷每飲酒宴會輒賓佐賦詩頗有情致江東人羅隱者佐錢鏐軍幕有詩名於天下紹威遣使路過致南書之敬隱乃聚其所爲詩投寄之紹威酷嗜其作因目己之所爲曰偷江東集又羅隱傳曰隱唐昭明中節度使錢鏐辟爲從事開平初太祖以右諫議大夫徵不至魏博節度使羅紹威密表推

萬乃授給事中。按舊唐書羅宏信傳附載子威，卽紹威也。新唐書新五代史俱作紹威。吳志伊十國春秋吳越列傳曰：羅隱，字昭諫，自號江東生，爲文章多氣力，而性傲睨，通曉閩語。王羅紹威將入境，先寓書敘家世，以紹威爲從子行。幕府吏皆怒曰：隱一布衣而經視大王，可乎？紹威素重士，且曰：隱名振天下，王公大人多爲所薄，今惠然肯顧，得爲從子幸矣。遂擁旆郊迎，執禮甚恭。隱亦不讓，比行，贈錢百萬，仍以書抵武肅王，稱爲季父。按紹威與隱通譜事，舊唐書文見於廣事類賦註，所引大略與舊五代史同。十國春秋則採於五代史補，故敘其本末，互有異詞。今並錄之。詩筆老學庵筆記曰：南朝詞人謂文爲筆，故沈約傳云：謝元暉善爲詩，任彦昇工於筆，約兼而有之。又庾肩吾傳：梁簡文與湘東王書，論文章之弊曰：詩既若此，筆又如之。又曰：謝朓沈約之詩，任昉陸厥之筆，任昉詩又有沈約任筆之語。老杜寄賀至嚴武詩云：賈筆論孤憤，嚴詩賦幾篇。杜牧之亦云：杜詩韓筆，兼來讀似倩麻姑癢處抓。亦襲南朝語爾。後石湖原註前有吳郡范石湖者，宋史列傳曰：范成大，字致能，吳郡人，素有文名，尤工於詩，自號石湖。有石湖集，攬轡錄，桂海虞衡集，行於世。按宋史藝文志載范成大桂海虞衡志三卷，今本名同，其書體例亦是志，非集。本傳與邵仲德、安簡錄俱作集，當是文誤也。舊唐書：裴君山房詩有裴章六明經詠爲修家譜作也。舊唐書指六君，魯靈光殿。文選王文考魯靈光殿賦序曰：自西京未央建章之殿，皆見燼燼，而靈光巋然獨存。意者豈非神明依憑支持，以保漢室者也。

石湖先生有遊阿林達經元煥詩云：我愁菩提壇，驚汝靈重服。云是病初起，煙藥久廢讀。憶昔玉山中，

